

ԱՐԵՎՄՏԱՀԱՅՈՒԹՅԱՆ ՎԻՃԱԿԸ ԸՍՏ ՕՍՄԱՆՅԱՆ ՍՈՒԼՔԱՆԱԿԱՆ ՖԵՐՄԱՆՆԵՐԻ
(XVI—XVIII դդ.)

Ա. Հ. ՓԱՓԱԶՅԱՆ

Օսմանյան կայսրության տիրապետության տակ գտնվող ոչ մահմեդական ժողովուրդներն աշխարհիկ և հոգևոր «արտոնություններ» ստացան սուլթան Մեհմեդ II-ի (1451—1481) գահակալության շրջանում: Այլադավան հպատակներին աշխարհիկ և հոգևոր իշխանություն տալով սուլթան Մեհմեդ II-ը և նրա հաջորդները ջանում էին համայնքների համակարգը ծառայեցնել իրենց նպատակներին: Նրանք օգտագործում էին պատրիարքների հեղինակությունը հպատակներին հլու հնադանդ և օտար պետությունների ազդեցությունից հեռու պահելու համար: Հարսանիքը, ապահարզանը, գույքային և կենցաղային վեճերը լուծվում էին տվյալ համայնքի կրոնական օրենքներով: Նրանց միջոցով գանձվում էին տարբեր տեսակի հարկեր թե՛ պետության օգտին և թե՛ տվյալ պատրիարքության համար:

Սուլթան Մեհմեդ II-ի և նրա անմիջական հաջորդների ֆերմանները, որոնք վերաբերում էին հույն և հայ պատրիարքների «առանձնաշնորհումներին», չեն պահանջել: Այդ ֆերմանները չեն հայտնաբերվել ո՛չ հույն, ո՛չ հայ պատրիարքարաններում և ո՛չ էլ Օսմանյան կայսրության արխիվներում: Շատ հավանական է, որ դրանք ոչնչացել են Կ. Պոլսում բռնկված հրդեհներից: Միայն հետագա պատմագիրներն են արձանագրում այն փաստը, որ Մեհմեդ II-ը Կ. Պոլսը գրավելուց հետո հույն և հայ համայնքների համար հատուկ ֆերմանով հաստատել է պատրիարքարաններ:

Հայ համայնքի (Ermeni milleti) պատրիարքությունը հատուկ հրովարտակով հաստատվել է 1461 թ., այն ժամանակ, երբ Մեհմեդ II-ը, Բուրսայի Հովակիմ եպիսկոպոսին տեղափոխելով Կ. Պոլիս, նշանակեց պատրիարք: Սակայն անհրաժեշտ է նկատի ունենալ, որ Հովակիմ եպիսկոպոսով չէ, որ սկսվում է հայոց պատրիարքության գոյությունը Կ. Պոլսում: Փաստերը վկայում են, որ Կ. Պոլսում հայկական հոգևոր առաջնորդություն է եղել դեռևս բյուզանդական կայսրության օրոք: 1360 թ. Կ. Պոլսում հայերն ունեին Ս. Սարգիս եկեղեցին և նրա շուրջը համախմբված հայկական համայնք:

Մեզ հասած ամենահին սուլթանական հրովարտակը, որը հաստատում է հայոց պատրիարքության իրավունքներն ու պարտականությունները Օսմանյան կայսրության սահմաններում, 1764 թ. հունիսի 3-ին Գրիգոր Պասմաճյանին (1764—1773 թթ.) շնորհված բերաթն է, որն առաջին անգամ հայատառ թուրքերենով հրատարակել է Ա. Բերբերյանը¹: 1774 թ. հունվարի 22-ին սուլթան Աբդուլ Համիդ I-ը (1774—1789) համանման բերաթ է շնորհել նաև Զաքարիա պատրիարքին (1773—1781), որի հայերեն թարգմանությունը՝ «Ազգիս հայոց պատրիարք Զաքարիա աստվածաբան վարդապետի պատրիարքության խատտի շերիֆի հայկական թարգմանյալ օրինակն է» վերնագրով

1 Ա. Պ եր պ եր յ ա ն. Հայոց պատմություն. Կ. Պոլիս, 1871, էջ 227—233: Վերջին շրջանում Թուրքիայում կատարված հետազոտությունները ցույց են տալիս, որ Ստամբուլի «Մի-նիստրների խորհրդի» և «Թոփթափու պալատի» արխիվներից բացի մեծ թվով դաֆթարներ պահպանվել են նաև «Քյամիլ Բեֆեշիի անձնական հավաքածուում»: Թուրք պատմաբան Ցավուզ Էրջանի տվյալներով այս հավաքածուում ամենահնագույնը 2539 համարի տակ գտնվող դաֆթարում ամփոփված 1517 թ. Ցավուզ սուլթան Սելիմի (1512—1520) կողմից նրուսաղեմի հաջ պատրիարք Սարգիս Գ-ին տրված հրովարտակն է: «Belleten», 1984, № 188, S. 1120.

հրապարակված է «Դիվան հայոց պատմության» մեջ²։ Ընդհանրապես, համայնքների կողմից ընտրված կրոնական առաջնորդը հաստատվում էր կայսերական հատուկ բերաթով, ուր սովորաբար կրկնվում էին նախորդ սուլթանների կողմից տրված հրամանները։ Այս մասին սուլթան Աբդուլ Համիդ I-ի կողմից շնորհված ֆերմանում կարդում ենք՝ «Ձի բոլոր և համանգամայն ֆէրմանք և հրամանագիրք առ նախնեօք մեծագոր արքայից, կրկին և վերստին նորոգիցի և հաստատիցի ընդ որս և հրամայեցաւ ի տերութենէ նորոգիւ և ֆէրմանքն մեծի Պօլսուլսա՝ Այնուհետև բերաթով նշվում էին համայնքի կրոնական առաջնորդի վարչական իրավունքները իր հոտի նկատմամբ, ինչպես նաև կրոնական ծիսակատարութիւնները, որոնք յուրահատուկ էին տրվել համայնքին։ Այդ բոլորը, ինչպես նշվում էր հրամանագրերում, չպետք է հակասեին շարիաթի դոգմաներին։ Այդ բարձր բերաթները շաղախված էին լինում կեղծ խոսքերով և փքուն խոստումներով, որոնց մեծ մասը, բնականաբար, չէր գործադրվում կյանքում։

Հայոց պատրիարքությանը շնորհված բերաթների բովանդակութունը ցույց է տալիս, որ հայ համայնքի կողմից առաջադրված յուրաքանչյուր նոր պատրիարք պարտավոր էր 100 հազար աղչե՝ միանվագ նվիրել սուլթանական զանձարանին, որպեսզի ձեռք բերեր իր պաշտոնին նշանակվելու բերաթը։ Այնուհետև պատրիարքը պարտավոր էր հայ համայնքից հավաքել «Միրի մուկաթա» հարկը (100—1400 հազար աղչե) և հանձնել կառավարությանը։ Այս հանգամանքը խիստ շահագրգռում էր սուլթաններին հաճախակի փոփոխելու պատրիարքներին, որպեսզի ամեն մի նորընտիր պատրիարքից կորզեր 100 հազար աղչե։ Հովակիմից սկսած մինչև Հակոբ եպիսկոպոս Պոլսեցի (1848 թ.) պատրիարքական աթոռին հերթականորեն բազմել են մոտ 82 անձնավորութիւններ։ Վերջին հարյուրամյակում դրամի ավելի շատ կարիք զգացող սուլթանները առանց պատճառի փոխել են սրանց, երբեմն նույն մարդուն երկու անգամ նշանակելու արտոնութիւն տվել և ամեն անգամ էլ ստացել սահմանված հարկազումարը։ Փաստերը ցույց են տալիս, որ սուլթանները ժամանակի ընթացքում բարձրացրել են պատրիարքության գինը։ 1657 թ. Թովմաս Բերիացին մեծ վեզիր Քյոփրլուտու Մեհմեդ փաշայից պատրիարքության հրովարտակ է ձեռք բերել վճարելով 400 000 աղչե³։ Պատրիարքները միաժամանակ պարտավոր էին նոր վեզիրին տալ 500 ղուրուշ, վեզիր-փոխանորդին՝ 250 ղուրուշ, չավուշ բաշուն՝ 200 ղուրուշ⁴։ Մի խոսքով, հայ հոգևորականութիւնը օսմանյան կենտրոնական կառավարության համար եկամտի կարևոր աղբյուր էր։ Ով տրամադրում էր մեծ գումար, նա էլ ձեռք էր բերում բարձր պաշտոն։

Կ. Պոլսի հայ համայնքին և ոչ մահմեդական այլ հպատակներին վերաբերող թուրքական պաշտոնական ֆերմանները հիմնականում ամփոփված են թուրք պատմաբան Ահմեդ Ռեֆիկի «Ստամբուլի XVI դարի կյանքը» խորագրով փաստաթղթերի ժողովածուում⁵։ Առաջաբանում հեղինակը նշում է, որ բոլոր վավերագրերը վերցված են Ստամբուլի պետական արխիվից։ Ցուրաքանչյուրին՝ ըստ բովանդակության, տրված է համապատասխան վերնագիր։ Իսկ ֆերմանների վերջում նշված տարեթվերը ցույց են տալիս, որ դրանք հրապարակվել են սուլթան Սուլեյման I-ի (1520—1566), սուլթան Սելիմ II-ի

² Գիրք Ժ, Մանր մատենագիրք, ԺԵ—ԺԹ գդ., հրատ. Գյուտ Աղանյանց. Թիֆլիս, 1912, էջ 219—228։

³ Նույն տեղում, էջ 248։

⁴ Թուրքական արժաթյա դրամ։

⁵ Մ. Զուլալյան. Արևմտյան Հայաստանը XVI—XVIII դդ. Երևան, 1980, էջ 232։

⁶ Ղ. Ինճիճեան. Աշխարհագրութիւն շորից մասանց աշխարհի. հ. 5, 2-րդ մաս, Վենետիկ, 1804, էջ 117։

⁷ Ahmet Refik. On altıncı asırda İstanbul hayatı (1553—1591). 2-ci b. sim. İstanbul. 1935.

(1566—1574) և սուլթան Մուրադ III-ի (1574—1595) ժամանակաշրջանում։ Սուլթանական այս հրովարտակաները բովանդակում են եկեղեցիների և այլ բարեպաշտական շինությունների քանդման, դավանափոխության, կրոնական ծիսակատարությունների և քրիստոնյա բնակչության ազգային տարազի հարցում եղած սահմանափակման, գինու վաճառքի արգելման վերաբերյալ և այլ բնույթի նյութեր։

Սուլթանական այս հրովարտականներից իմանում ենք, որ սուլթան Սելիմ I-ի ժամանակ Կ. Պոլսի եկեղեցիներից շատերը քանդվել են⁸։ Իսկ Սուլթան Սուլեյմանի գահակալության շրջանում, Կ. Պոլսի կադիին ուղղված հատուկ ֆերմանով քանդվել է Սուլու-մանաստրի (Ս. Գևորգ) հայկական եկեղեցուն կից կառուցված շինությունն ու սահմանափակումներ են դրվել կրոնական ծիսակատարությունների վրա։ «Իմ բարձր հրամանագիրը առնելուդ պես քանդել տուր շարիաթի սկզբունքներին հակասող շինությունը։ Միևնույն ժամանակ թույլ շտապ իրենց հնագույն եկեղեցիներում ծնծղա խփելու, բարձր ձայնով երգելու և գինի խմելու Պետք եղածի պես զգուշացրու հիշյալ վանքի քահանաներին, որ եթե այսուհետև շարիաթին կամ իմ բարձր հրամանին հակառակ որևէ շինություն կառուցեն, նույնպես ենթարկվելու է քանդման»⁹։

Հարկ է նշել, որ հայկական և թուրքական պատմագրական աղբյուրներում ևս եկեղեցիների քանդման կամ մզկիթի ձևափոխման փաստերը շատ են։ Հայտնի է, որ Կ. Պոլսի գրավման հաջորդ օրը Ս. Սոֆիա տաճարը վերածվեց մզկիթի։ Նույն ճակատագրին արժանացան նաև Ս. Առաքյալների տաճարը և այլ եկեղեցիներ։ Սուլթանական հրովարտական արգելվեց նաև նոր եկեղեցիների կառուցումը։

Այս շարաբաստիկ երևույթը շարունակվեց նաև հետագա դարերում ոչ միայն Կ. Պոլսում, այլև պատմական Հայաստանի քաղաքներում և դուրսերում։ Այս կապակցությամբ XVI դարի ժամանակագիր Հովհաննիսիկ Մարեցին նշել է. «Իսկ ՌԼԲ (1583) թվականին, դարձեալ հրաման եղև ի Մուրատ խոնդկեարէն զօրապետաց և զօրաց իւրոց՝ ելանել ի վերայ Յէրևանայ և առնուլ զնա։ Եւ եկին իսկ և աւերեցին, և բազում եկեղեցիք քակեալ, զքարինս ի շինումն բերդին տանէին, որ և կամեցան զմեծ եկեղեցին, որ Յերկու երեսի ասի, ևս քակել»¹⁰։

Մի այլ ժամանակագիր էրզրումի բերդում կատարված ավերածությունների մասին հայտնել է հետևյալը. «...Բազում եկեղեցիք, զորն երևին և զորն արարեալ են մզկիթ և զորն քակեալ կան։ Եւ է գերեզման սրբույն Սահակայ և Յօսեփայ, որ այժմ եկեղեցին անարատ և է ի ձեռս անհաւատից»։ «Եկեղեցիք բազումք, որ այժմ է ի ձեռս Տաճկաց անկեալ կան, զորն արարին ամբարանոյք և զորն քակեալ և քայքայեալ են այժմոյս շին երևիլ»¹¹։

Իսկ XVII դարի թուրք հանրահայտ ճանապարհորդ էվլիա Չելեբին Կարսում եկեղեցիները մզկիթի վերածելու մասին արձանագրել է հետևյալը. «Կարսում գտնվող «Սուլեյման էֆենդի» մզկիթը մուսուլմանական հավատի ոճով կառուցված, շքեղ արտաքինով լավ սրբավայր է։ [Նախկինում] այն քրիստոնեական եկեղեցի է եղել և ձևափոխվել է մզկիթի։ «Հյուսիսն քեդխուդա» մրզկիթը նախապես եղել է քրիստոնեական հոյակապ մի տաճար, որը կոչվել է «Կարմիր եկեղեցի», սակայն սուլթանական հրամանագրով այն ևս ձևափոխվել է մզկիթի և այդպես փրկվել անհավատների ձեռքից»¹²։

Սուլթանական ֆերմաններից իմանում ենք, որ նույնիսկ նախկին եկեղեցիների վերանորոգման համար անհրաժեշտ էր դիմել կայսերական դիվանին

⁸ Նույն տեղում, էջ 45։

⁹ Նույն տեղում, էջ 27։

¹⁰ Մանր ժամանակագրություններ, XIII—XVIII դդ., կազմեց Վ. Ա. Հակոբյան. հ. 2, Կրեան, 1956, էջ 244։

¹¹ Նույն տեղում, էջ 563, 564։

¹² Эвлия Челеби. Книга путешествия, вып. 3, М., 1983, с. 197.

և հատուկ թուլլտվություն ստանալ: Մահմեդականներից կազմված հանձնաժողովը ստուգում, արձանագրում էր վերանորոգման ենթակա կետերը և այնուհետև տալիս էր արտոնությունը այն պայմանով, որ նորոգումը կատարվեի նախկին շինության նյութով և միևնույն չափսերով: Այս մասին եկեղեցիների նորոգման վերաբերյալ սուլթան Համիդ I-ի հրովարտական (22 հունվար 1774 թ.) ասված է. «Նախապէս ուր ուրեք և իցէ քաղաքի մօլլայն և այլք կարդացողք և տաճիկք մեծամեծք, գնացեալ աշօք իւրեանց տեսցեն և քաղքայեցեալ աւելեալ տեղեացն վերահասու լիցին, երկայնութիւնն և լայնութիւնն այնր եկեղեցւոյն ըստ բնականի շինութեանն՝ ոչ աւելի և ոչ պակաս՝ զննիցեն՝ տեսցեն և վկայեսցեն և ի գիրս աւանդեսցեն հէօճէթիւ, ապա յետ այնր՝ հրամայեցեալ է դաւերեալ տեղիս նորոգել և շինել ոչ ավելի և ոչ պակաս, մի լիցին ձեռնամուխ ըստ այլք, զի մի յետոյ վնասիցին»¹³:

Եկեղեցիների ստուգման վերաբերյալ սուլթան Աբդուլ Համիդ I-ի ֆերմանում նշված է, թե ինչպես մի շարք մոլեռանդ թուրքեր իրենց չարամիտ նպատակներով օգտագործել են եկեղեցիների վերանորոգման առիթը և անտեղի բողոքներ ներկայացրել կառավարական պաշտոնատար անձանց և մահմեդական հոգևորականությանը: Սրանք, օգտագործելով առիթը, իրենց հերթին անարգել գործադրել են հայ ռայայի նկատմամբ իրենց թշնամանքի ու ատելության կիրքը. «Այլև յոմանս քաղաքս և գիւղս, և յայլս նահանգս ոչ գլուխ խոնարհեալ ցուցանելով բարձրագոյն մերոյս հրամանի առ նախանձուկ, կամ վասն կաշառս առնելոյ և կամ վնասս հասուցանելոյ մաքառին ընդ խրդճալի հայոց ազգին և երթեալ առ մօլլայն, առ վօլվօտայն և առ մեծամեծ անձինս բառնալով՝ դրդեն զնոսս ի բարկութիւն, զի կամ տուգանօք վնաս հասուցեն և կամ զնորոգեցեալ տեղիսն քաղքայեսցեն, մեծամեծքն տէրութեան իմոյ, հավատացեալ նոցին նախանձախնդիր խօսից՝ զօրացուցանեն զբարկութիւնս իւրեանց, և լինին վրեժխնդիրք խղճալի ըստ այլն, զի կրկին տուգանք և փող առցեն, և զծարավս ազահութեանց յագեցուցեն, և եթէ ոչ տայք զտուգանս ասեն ըստ այլն ի բանտ և ի տանջանս մատնեմք դժեգ, որով երկուցեալ վշտացուցանեն զազգն հայոց, և նոքա ոչ կարացեալ տանին զայսպիսի նեղութիւնն, թողուն զտեղիս և զտունս և փակողին անտի, լինելով ցիր ու քան և ոմանք ևս ի բանտ արդեւեալք և խոշտանկեալք ախ յալուլեամբ գբաւեն զկեանս իւրեանց»¹⁴: Այնուհետև սուլթանական ֆերմանում նշվում է, թե ինչպես նոր պաշտոնի անցած կադիները, մօլլաները, հարստանալու տենչով համակված, զանազան որոգայթներ են հյուսում և տուգանքներով, կաշառակերությամբ նեղում և վշտացնում հայ ռայային:

Փաստերը ցույց են տալիս, որ XVII—XVIII դդ. ընթացքում ևս այս կամ այն պատրվակով հիմնահատակ քանդել են մեծ թվով եկեղեցիներ: Բերենք մի օրինակ Թոքաթին վերաբերող թուրքական վավերագրներից. «1720 թ. հոկտեմբերին Թոքաթում Քառասուն[մանկանց] եկեղեցին ընդարձակելու համար երբ կառավարությունից թուլլտվություն է ձեռք բերվում, մահմեդական բնակչությունը գազազելով (22 շեվվալ, կիրակի օրը), եկեղեցու վերանորոգման աշխատանքները սկսելու ժամանակ աղմուկ աղաղակ բարձրացնելով, հարձակվում են, եկեղեցին քանդում, իսկ վանքն էլ այրում»¹⁵: Այս իրադարձությունը արձանագրված է նաև հայկական աղբյուրներում: Թոքաթում պահվող «Պատկերահանի Ավետարան» կոչված մի ձեռագիր հիշատակարանում նշված է. «Ֆէրման բերին զսուրբ քառասնից եկեղեցին նորոգելու, առին հրաման և նորոգիցին մինչև ոչ թամամիլն ժողովեցան Թոխաթու ալլազգիքն ամենայն գրոհ տուեալ հասին ի սուրբ Քառասունք և քակեցին»¹⁶:

¹³ Մանր մատենագիրք, էջ 250—251:

¹⁴ Նույն տեղում էջ 251:

¹⁵ H. T. Çinilloglu. Tokat tarihi. 2-ci kısım, 1950, s. 34—35.

¹⁶ Մանր մատենագիրք, էջ 378:

Ա. Ժելյազկովան, բալկանյան երկրներում բռնի մահմեդականացման քաղաքականության մասին խոսելիս, հենվելով թուրքական ֆերմանների ու այլ վավերագրական նյութերի վրա նշում է, որ նույնիսկ քաղաքային բնակչության ամենացածր խավը դիմել է հավատափոխության, նախ, որպեսզի աղատվի ծանր հարկապահանջությունից և երկրորդ՝ ստանա մահմեդականությունը ընդունողի համար սահմանված նվերներն ու դրամական բարձր պարգևը: Իր հետազոտության վերջում Ա. Ժելյազկովան, ընդհանրացնելով, նշել է այն կարևոր գործոնները, որոնք նպաստում էին մահմեդականության բռնի տարածման քաղաքականությանը: Դրանք են. Սրբազան պատերազմների (չիհադ) ընթացքում մահմեդական կրոնի մոլեռանդության սաստկացումը, գերեվարությունը, մանկաժողովը և ծանր հարկապահանջությունը²²:

Թուրք պատմաբան Հ. Թունջերի հրապարակած թուրքական միջնադարյան կանոննամաներում ևս պարզ նշվում է, որ մահմեդականությունը ընդունելու դեպքում քրիստոնյան ազատվում էր իսպենջի հարկ վճարելուց. «Ոչ մահմեդական ռայայից սիփահին իսպենջի հարկ է գանձում: Հետագայում եթե ոչ մահմեդականը դավանափոխ լինելով մահմեդականություն ընդունի, սիփահին իրավասու չէ նրանից իսպենջ գանձելու: Միմիայն բեննաքի հարկ կարող է գանձել: Այս մասին գոյություն ունի կայսերական ֆերման»²³:

Իսկ նրանց համար, ովքեր հրաժարվում էին մահմեդականությունից և ձգտում էին կրկին վերադառնալ իրենց նախկին հավատին, սահմանվում էր խիստ պատիժ: Բանտային խոշտանգումներից կարող էր ազատվել նա, ով վերջնականապես կվերադառնար դեպի մահմեդականությունը:

Ահա թե ինչ է գրում այդ մասին միջնադարի հայ ժամանակագիր Գրիգոր Դարանաղյին. «Տաճիկը մեծ վարձք համարելով զքրիստոնեից ուրանալ զքրիստոս և ի Մահմեդի օրէնս և ի կրօնս դառնալ, զխաչ և զկեղեցի բեկանել և խորտակել և հավատացեալք, որ ոչ հաւանին Մահմեդի և չար կրօնից նորին, ազգի-ազգի տանջանօք շարշարեն և հրով այրեն և համարեն պաշտօն աստուծոյ մատուցանել»²⁴:

Իսկ Մուշից Կ. Պոլիս ուղարկված մի բողոքագրում ասվում է. «Ելաթա մեջ հայ կին մը սաստիկ ծեծելով թեն ու գլուխը ջարդեցին զորով տաճիկցենքու համար»²⁵:

Ջանգվածային բռնի մահմեդականացման լավագույն օրինակ կարող է հանդիսանալ Համշենի բնակչության հավատափոխությունը: Համշենահայերը՝ բուն Համշենում, Կարադերեի շրջանում և Ճորոխի հովտում մահմեդականություն են ընդունել տասնամյակներ տևած համառ պայքարից հետո: Համշենի հայության կողմից մահմեդականությունը բռնի ընդունելու և թրքախառն մասին կարևոր տեղեկություն է տալիս Ղ. Ինճիճյանը. «Բնակիչք երկրին յառաջագոյն հայք էին, այլ ի յելս Ժէ գարուն և ի սկիզբն ԺԸ երրորդին առհասարակ հանդերձ ամենայն շրջակայ գիւղօրէիւք դարձան ի տաճկութիւն սակս բռնութեան հարկապահանջութեան...»²⁶: XIX դարի վերջին տասնամյակներին արդեն այդ շրջաններում մահմեդականությունն ըստ ամենայնի զանգվածային տարածում էր ստացել²⁷:

²² А. Желязкова. Некоторые аспекты распространения ислама на балканском полуострове в XV—XVIII вв.—Османская империя, сб. статей, М., 1986, с. 113—115.

²³ Н. Тüncel. Osmanlı İmparatorlugunda toprak hukuku. Ankara, 1962, S. 77.

²⁴ Գրիգոր Դարանաղի. Ժամանակագրութիւն. Երուսաղեմ, էջ 467—468:

²⁵ Մանր մատենագիրք, էջ 493:

²⁶ Ղ. Ինճիճյան. Նշվ. աշխ., էջ 396:

²⁷ Լ. Խաչիկյան. Էջեր համշենահայ պատմությունից.—«Բանբեր Երևանի համալսարանի», 1969, № 2, էջ 138:

Մահմեդականների և ոչ մահմեդականների միջև խտրականություն կար սովորական կենցաղային հարցերում: Քրիստոնյան չէր կարող իր ցանկացած ձեռով հարսանիք կատարել ու հուղարկավորություն անել պատշաճ ծիսակատարությունում: Չէր կարող նաև մահմեդականին հատուկ զգեստներ և կոշիկներ կրել և ձի նստել նրա ներկայությամբ: Անդրադառնալով մահմեդական թուրքերի իրավական դրությունը, Կ. Մարքսը գրել է. «Սոցիալական ինչպիսի դրություն մեզ էլ լինի, թուրքը պատկանում է արտոնյալ կրոնին և ազգության: Միայն նա իրավունք ունի զենք կրելու և ամենաբարձր դիրք ունեցող քրիստոնյան պարտավոր է ամենացածր խավին պատկանող մահմեդականին ճանապարհ զիջելու»²⁸:

Հասարակական անբարոյ երևույթների և քրեական հանցագործությունների մասին սուլթան Սելիմ II-ի ժամանակ կազմված օրենքի մեջ նույնպես նկատվում են խտրականության փաստեր: Քրեական հանցագործություններին վերաբերող հոգվածների վերջում նշվում է, որ «եթե վերոհիշյալները տեղի ունենան անհավատների [քրիստոնյաների] հետ, կամ արտոնյալ իրավունքներից օգտվող [օտարականների] հետ, թող որ հարկը նրանցից զանձվի կրկնակի չափով»²⁹:

XVII դարի սկզբներին Թուրքիայում և Արևմտյան Հայաստանում ճանապարհորդած Սիմեոն Լեհացին ևս մանրամասն նկարագրում է այն հարստահարություններն ու ճնշումները, որոնց ենթակա էր սուլթանական բռնապետության տակ հեծող հայ ժողովուրդը: Սիմեոն Լեհացին կենցաղային խտրականության մասին խոսելիս նշել է, որ զավառական քրիստոնյաները դրված էին լավ չուխա հագնելու կամ մեծ տուն ու այգի ունենալու իրավունքից: Նրանց արգելված էր անգամ ձի, ջորի կամ էլ հեծնել: Հակառակ պարագային պետք է «ուլախ» կոչված դրամական տուգանք վճարեին³⁰:

Ահա թուրքերեն մի փաստաթուղթ (թեզքերե), որը տրված է եղել կարենցի երեւելի սարաֆ Մահմեդի Մանուկ Աստվածատրյանին (Ալահվերտի ամիրա)՝ «Օսմանյան պետության բարձր պաշտոնատներում իր մատուցած ծառայություններով համբավ ձեռք բերած, սարաֆների դասակարգին պատկանող հիշյալ [անձնավորությունը] հիվանդ և ծեր լինելու պատճառով սուլթան թեզքերեն տրվեց: Մահմեդականի ձի նստելու կերպին չմանվելու պայմանով»³¹:

Թուրքական ֆերմանները միանգամայն հաստատում են, որ հրեայի, հույնի, հայի հազած տարազը թանկարժեք կերպասից կամ ոտնամանի արժեքավոր կաշվից չպետք է լինեն: Թուրքերը գլխապանի գույնից և ձևից չպետք է ճանաչեն, թե մարդիկ որ կրոնի կամ ինչ դիրքի են պատկանում: Հենց այս մասին էլ 1577 թ. սուլթան Մուրադ III-ը Ստամբուլի կադիին անում է հետևյալ կարգադրությունը. «Այսուհետև հրեաների և քրիստոնյաների հազած չուխաները, իշքարլատները³², խալաթները չպետք է պատրաստված լինեն ատլասից, կամկալից³³ և այլ մետաքսյա գործվածքներից: Ֆերաշենները³⁴ նույնպես չպետք է մետաքսից լինեն, այլ աստառացու կտորից: Դյուլբենտը (շղարշ) նույնպես բարակ և նուրբ տեսակի չի լինելու և իրենց գլխի փաթթոցներն էլ՝ ոչ այնքան շքեղ: Մի խոսքով, չպետք է իրենց արտաքինով և շարժումներով նմանվեն մահմեդականներին... Նրանք ովքեր չեն հնազանդվի և կվարվեն հակառակ իմ բարձր հրամանին, ենթարկվելու են պատժի: Անհնա-

28 К. Маркс и Ф. Энгельс. Сочинения. Т. 9, М., 1957, с. 6.

29 Книга законов султана Селима I. Публикация текста, перевод, терминологический комментарий и предисловие А. С. Твердиновой. М., 1969, с. 35.

30 Սիմեոն Լեհացի. Ուղեգրություն. Վիեննա, 1931, էջ 193—194:

31 «Բազմավեպ», 1934, № 1, էջ 31:

32 Իտալերեն skarlato բառից: Կարմրագույն վենետիկյան չուխա:

33 Մետաքս գունավոր գործվածք:

34 Լայն թևերով ծածկոցանման հագուստ, որի մեջ փաթաթվում էին մահմեդական կանայք:

դանդներին կայանքի տակ առնելով կբանտարկես և կտեղեկացնես»³⁵։ Ոչ մահմեդականներին վերաբերող այս սահմանափակումները հաստատվում են նաև տվյալ ժամանակաշրջանի հայկական աղբյուրներով։ XVI դարի մի ժամանակագրության մեջ արձանագրված է. «Եւ ի Ռիթ (1580) թին հայոց նեղացաւ Մուրատ խոնդքեարն ի հրէից և ի քրիստոնէից համարձակութենէն և վերացոյց զփակիղն ի գլխոց նոցա, և սաստիկ եասախ արար և սահմանեաց զսև գտակ ղնելն, բայց ի տեղիս կաշառս ետուն և առին զհրաման շնել զփակիղ, լետ ժը ամի (1598 թ.) ապա Կոստանդինուպոլիս. և ալ բազում քաղաքք մնացին գտակով»³⁶։

Երևմտահայ Քյոմուրճյանը իր օրագրության մեջ նշում է. «Իսկ յայգուցն մուսուլմանական աղաղակեալ յամենայն քաղաքս՝ եասաղ արարին զփակեղս քրիստոնէից ղիսայտ և զկապուտն զի բնամ մի երեսացի։ Եւ ի մեծամեծաց մինչև ցփոքունս եղին գտակ ի գլուխս և ղալփաղ և զհանդերձս ի վատ և ի տգեղ ամենևիմբ»³⁷։

Հետագա դարերում ևս արգելված է եղել ազգային տարազի ազատ կրումը. այդ է վկայում XVIII դարի թուրք պատմագիր Վասրֆը։ Նա իր տարեգրության մեջ 1757 թ. դեպքերը շարադրելիս, Շալաանների հագուստի կանոնի տակ նշում է հուլյն, հայ և հրեա համայնքների սահմանափակմանը վերաբերող սուլթանական հրամանագրի մասին³⁸։ Տարաշինակ է, որ ժամանակակից թուրք պատմաբան Յալուզ Էրջանո տառադր խնդրում դոյություն ունեցող այդ խտրականությունը փորձում է մեկնաբանել տնտեսական դժվարությունների հոդի վրա³⁹։ Մինչդեռ փաստերը ցույց են տալիս, որ խտրականություն է եղել կենցաղալին ամենապարզ հարցերում ևս։ Օրինակ, միջնադարյան կանոններից մեկում կարգում ենք. «[Բաղնիքում] միևնույն սրբիչը քրիստոնյային և մահմեդականին տալը արգելված է։ Քրիստոնյաներին տրվող սրբիչները պետք է նշանով առանձնացված լինեն։ Վարսավիրները միևնույն ածելիով չեն կարող մահմեդականի և քրիստոնյայի գլուխը ածելել»⁴⁰։ Մի խոսքով, շարիաթի դոգմաները չէին կարող հավասարություն ղնել մահմեդականի և ոչ մահմեդականի միջև։ Չնայած քրիստոնյան էլ միևնույն պետության հպատակն էր, բայց նա միշտ պիտի ենթարկվեր ու հարկատու լիներ մահմեդականին։

Արևմտյան Հայաստանում մանկաժողովի (դեշիրմե) կիրառման քաղաքականությունը ես կատարյալ մի պատուհաս էր հայ ժողովրդի համար։ Արևմտյան Հայաստանի նահանգներում մանկաժողովը սկսել է կիրառվել 1519 թ.։ Այդ մասին Անանուն Սեբաստացին իր ժամանակագրության մեջ նշում է հետևյալը. «Ի թին ԶԿԸ (1519) բարկութիւնն Աստծոյ սաստկացաւ և սուլթան Սելիմն տղայ ժողովեց ի քրիստոնէից»⁴¹։ Վկայություն կա նաև այն մասին, որ հայերից մանկահավաք կատարվել է դեռևս 1464 թ.։ Մի ձեռագիր հիշատակարանում ասված է հետևյալը. «...Իսկ անօրեն արքայն տաճկաց ժողովեաց ղքրիստոնէից մանկունս և երբը Ըստամբուլ, իսկ եպիսկոպոսն եկեալ ի հետ մանկացն և եւէր օթուղթ ազատութեան հայոց, իսկ անօրէն արքայն ոչինչ համարեցաւ զթուղթն»⁴²։

Մանկաժողովին վերաբերող պատմագիտական և հատկապես վավերագրային նյութերը Ստամբուլի արխիվներից հավաքել և երկու հատորով հրա-

35 Ա. Ռեֆիկ. նշվ. աշխ., էջ 51։

36 Մանր ժամանակագրություններ, հ. 2, էջ 516։

37 Օրագրություն Երեմիա Զելեպի Քյոմուրճյանի, էջ 400։

38 Թուրքական աղբյուրներ, հ. Ա, էջ 215։

39 Belleten, 1994, № 188, s. 1142.

40 Հ. Թյունջեբ. նշվ. աշխ., էջ 62։

41 Մանր ժամանակագրություններ, հ. 1, Երևան, 1951, էջ 169։

42 Ժն դարի հայերեն ձեռագրերի հիշատակարաններ, կազմեց Լ. Ս. Խաչիկյան. մասն Բ, Երևան, 1956, էջ 302։

տարակել է թուրք պատմարան Ի. Ուզունչարշըլըն⁴³։ Հրապարակված հրովարտականերից իմանում ենք, որ մանկաժողովը տեղի է ունեցել յուրաքանչյուր երկու կամ հինգ տարին մեկ անգամ։ Մանկաժողովի պաշտոնին նշանակված վերակացուն սուլթանական ֆերմանը ձեռքին շրջում էր իրեն հատկացված կադիթլիկոններում (վարչադատական միավոր) և հավաքագրում ութից քսան տարեկան ֆիզիկապես առողջ և ամրակազմ քրիստոնյա տղաներին։ Այնուհետև պահակների հսկողության ներքո տղաներին բերում էին Ստամբուլ և հատուկ գրանցման դաֆթարներով ներկայացնում ենիչերիների աղային։ Այստեղ փոխելով նրանց հագուստները, հագցնում էին դեղին գույնի դուլամա⁴⁴, իսկ վրայից էլ կարմիր արա⁴⁵։ Մանկաժողովի ենթարկված յուրաքանչյուր խմբին, Ստամբուլ հասնելուց հետո, տրվում էր երկու-երեք օր հանգիստ։ Այնուհետև փոխում էին նրանց անունները, կատարում մահմեդական հավատը ընդունելու երդման արարողություն և ապա ենթարկում թլփատման։ Պարզվում է, որ մանկաժողովի ենթարկված տղաների հագուստն ու ճանապարհածախսը, «կուլակչեսի» (Ստրուկի ակչե) անվան տակ, գանձել են նրանց բնակավայրերից, 80 կամ 100 ակչեի սահմաններում։ Փաստերը վկայում են, որ այս գումարը XVII դարում հասել է մինչև 600 ակչեի⁴⁶։

Վերոհիշյալ արարողությունից հետո հատուկ զորանոցային սլայմաններում տղաներին դաստիարակում էին մոլեռանդ մուսուլմանական ոգով և դարձնում ենիչերի։ Մանկաժողովին վերաբերող հրովարտականներից տեղեկանում ենք նաև, որ զինվորական ծառայության փոխարեն հաճախ տղաներին որպես ձրի աշխատուժ աշխատացրել են նավաշինարաններում, անտառներում, շինարարության վրա և այլուր։ Իսկ գեղեցիկ, վայելչակազմ տղաներին օգտագործել են պալատական զանազան աշխատանքներում⁴⁷։

Մանկաժողովի ընթացքում երեխաներին ծնողներից բաժանելու տխուր պատկերը, որը զուգակցվում էր թուրք պաշտոնյաների գործադրած վայրագություններով, մի կատարյալ ողբերգություն էր։ Մանր զրկանքներից և հատկապես հավատափոխությունից խույս տալու նպատակով հաճախ տղաները փորձել են փախուստ տալ կամ էլ ծնողները կաշառքի ուժով ամեն կերպ ձգձուգել են ազատել իրենց երեխաներին այդ չարաբաստիկ աղետից։ Այսուհանդերձ այդպիսիների նկատմամբ ձեռնարկվել են կտրուկ միջոցներ և հայտնաբերվածներին կրկին վերադարձրել են ենիչերիների աղային։ Այս մասին Կեսարիո բեյին ուղղված սուլթանական հրովարտականներից մեկում ասված է. «Արդ, հրամայում եմ, երբ իմ բարձր ֆերմանը տեղ հասնի, հետամուտ եղիր այս գործին և իմ բարձր հրամանով դեշիրմեի ենթարկված այն տղաներին, որոնք փախուստի դիմելով հավատափոխ են եղել, հավաքիր, անունները դրելով դաֆթար կազմիր և վստահելի անձանց հետ ուղարկիր Ստամբուլ։ Նրանց հսկող անձանց կարգադրիր, որ ճանապարհին խիստ ուշադիր լինեն»⁴⁸։

Ի. Ուզունչարշըլըն ընդունում է, որ բալկանյան ժողովուրդներից բացի հայերն ու վրացիները ևս ենթարկվել են մանկաժողովի։ Նույնիսկ բերում է մի քանի օրինակներ, որտեղ ցույց է տրվում, թե դեշիրմեի ենթարկված հայ պատանիները հետագայում հասել են բարձր պաշտոնների։ Պարզվում է, որ XVI դարի հանրահայտ ճարտարապետ Կոջա Սինանը նույնպես դեշիրմեով հավաքագրված երեխաներից է։ «Հանրահայտ ճարտարապետ Սինանը,—

⁴³ I. H. Uzunçarşılı, Osmanlı devleti teşkilatından kapukulu ocakları, Ankara, c. I. 1943, c. 2, 1944.

⁴⁴ Արտահագուստ (թուրքերեն փաթաթել բառից). այդպես է կոչվել, որովհետև փեշի ծայրերը փաթաթվելով մտցվել են մեջքի մեջ։ Հագուստի վերին մասը մինչև գոտկատեղը կոճկվել է. թևերը եղել են լայն, բազուկների մոտ՝ նեղ։

⁴⁵ Կոշտ բրդյա կտորից վերարկու։

⁴⁶ Ի. Ուզունչարշըլըն, նշվ. աշխ., հ. 1, էջ 18։

⁴⁷ Նույն տեղում, էջ 126։

⁴⁸ Նույն տեղում։

գրում է ի. Ուղունշարշը, — սուլթան Սելիմ Ահմեդի ժամանակ Կեսարիայից առաջին անգամ մանկածողովի ենթարկված երեխաներից էր⁴⁹։ Սակայն ի. Ուղունշարշը ճարտարապետ Սինանի մասին խոսելիս ստույգ չի նշում նրա ազգությունը։ Փաստերը ապացուցում են, որ Սինանը ազգությամբ եղել է հայ։ Այդ հաստատվում է Թուրքիայի մինիստրների խորհրդի արխիվում պահվող մի վավերագրից⁵⁰։ Այս վավերագրի հիման վրա Բարս Թուզլաջըն (Բարսեղ Թուզլաջանը) նշում է հետևյալը. «Կոչա Սինանը, որը XVI դարում օսմանյան ճարտարապետական արվեստի զարգացման գործում իր խոր ազդեցությունն է ունեցել, ծագումով եղել է հայ»⁵¹։

Յավուզ էրջանը, աղավաղելով փաստերը, աշխատում է ժխտել պատմա-րանների կողմից ընդունված այն թեզը, որ դեշիրմեն, իբր, պատմականորեն մեծ դեր չի խաղացել քրիստոնյաներին զանգվածաբար մահմեդականացնելու և թուրքացնելու խնդրում⁵²։ Յավուզ էրջանը, համենայն դեպս, պետք է որ ծանոթ լիներ ի. Ուղունշարշի արձանագրած հետևյալ փաստին. «Յրլըբըմ Բայազեդից հետո հպատակ քրիստոնյա երեխաներին մանկածողով ենթարկելու համար կազմվել է մի օրենք։ Այս նոր օրենքով Ռումելիի բոլոր ոչ մահմեդական ժողովուրդները աստիճանաբար պիտի մահմեդականացվեին։ Իսկ մահմեդականացված այդ զինվորների քանակով հզորանալու էր թուրքական բանակը»⁵³։

Իրոք որ, զինվոր հավաքագրելու այս եղանակով օսմանցիները նախ կրկնապատկում էին իրենց զինվորների քանակը և միևնույն ժամանակ աշխատում էին մեջտեղից վերացնել քրիստոնյաների ամենաառնական տարրերին։ Այս նույն միտքը հաստատում է նաև անգլիացի հանրահայտ պատմաբան Հ. Վ. Գիբբոնսը, նշելով, որ Բայանյան ժողովուրդների շրջանում բանակի համար զինվոր հավաքագրելը իրենց համար առավել մի ծանր հարված էր, քան հարձակման հանդիպումների հավաքը, որովհետև ընտրում և հավաքում էին ամենավայելակազմ և ուժեղ պատանիներին⁵⁴։

Անկասկած մանկածողովը մի հզոր միջոց էր թուրք կառավարողների ձեռքին՝ իրենց համաձուլման քաղաքականության իրականացման ճանապարհին։ Այստեղ տեղին է հիշատակել XVI դարի թուրք պատմագիր Մուստաֆա Սելանիկի էֆենդիի եզրակացությունները դեշիրմենի մասին։ Նա իր «Պատմության» մեջ գրել է. «Ժամանակի իշխողները տղաների դեշիրմենի գործում անխիղճ են եղել և նվերի անվան տակ շատ մեծ կաշառքներ են վերցրել, ինչպես գայլն է հարձակվում ոչխարի հոտի վրա, այնպես էլ նրանք ագահորեն հարձակվել են երկրի ռայաների վրա։ Հարուստ ռայաներից խլել են անթիվ անհամար հարստություն, իսկ աղքատ ռայաներից՝ նրանց զավակներին, քանդել են նրանց տունն ու տեղը»⁵⁵։

Հարկ է նշել, որ XVI—XVII դդ. նվաճողական քաղաքականության հետևանքով տեղի ունեցած երկարատև պատերազմական գործողությունները Թուրքիայի և Իրանի միջև ավերիչ հետևանքներ ունեցան հատկապես Հայաստանի համար։

Տվյալ ժամանակաշրջանի հայ պատմիչները, ժամանակագիրներն ու հիշատակարանների հեղինակները, ամենայն իրավամբ, խիստ մոռյալ գույներով

49 Նույն տեղում, էջ 20։

50 Başbakanlık sarfı, mühimme defterleri serisi, nu. 123, s. 240. Pars Tuglacı. Osmanlı mimarlığında batılma dönemi ve Balyan ailesi. İstanbul, 1981, s. 1.

51 Նույն տեղում։

52 S. u. Belleten, 1984, № 188, s. 1137.

53 ի. Ուղունշարշը, նշվ. աշխ., հատ. 1, էջ 13։

54 H. A. Gibbons. Osmanlı İmparatorluğunun kuruluşu. İstanbul, 1923, s. 100 (արաբատառ թուրքերեն թարգմանություն)։

55 S. u. Թուրքական աղբյուրներ, հ. Բ., էջ 137։

են նկարագրում հայ ժողովրդի վիճակը թուրքական և պարսկական տիրապետության տակ: Այդ ժամանակաշրջանը հայկական աղբյուրներում բնորոշվում է որպես «վրդովման» ու «ալեկոթման» շրջան: Բերենք մի հատված Հովհաննես Արճիշեցու տարեգրությունից (XVI դար), որտեղ հեղինակը ականատեսի աչքով նկարագրել է 1531—1534 թթ. թուրքերի և պարսիկների միջև տեղի ունեցած պատերազմները Վանա լճի շրջակա գավառներում. «Ասաղ զիմ հոգիս հայրք և եղբայրք, թէ քանի շարիք գործեցաւ ի յայս հեծեալ շարժութեանցս և ի վրդովմանցս,—գրել է Հովհաննես Արճիշեցին,—քանի քաղաք և գաւառ աներեցան և քանի վանօրայք և եկեղեցիք քակտեցան, քանի մեծատունք աղբատացան, և վաճառականք թալանեցան, քանի քրիստոնեայք գերի վարեցան, և անմեղ տղայքն ի յանօրէնքն խառնեցան և շնմ կարնար գրել շարիքն, զոր վերին աշխարհն քաշեց ևս առաւել ծովու բոլորս»⁵⁶: Իսկ Ա. Դավրիժեցին այսպես է պատկերում այդ պատերազմները. «Սւ ի շարժմանէ ալսց երկուց տիեզերակալացս՝ որք զարթուցեալք են ի պատերազմ. եթէ Սարդարն՝ որ եկն յարեմօտից, և թէ շահն՝ որ ի կողմս արեւելից՝ թէ որքան անբարութիւն և քանդումն եղև աշխարհի, թէ ի դալն և թէ ի դառնալն, թէ որքան ծանրաբեռն հարկապահանջութիւն եղեալ ի վերայ ժողովրդեանն...»⁵⁷:

Գանձվող բազմաթիվ հարկերի պատճառով ռայայի վիճակը այնքան էր ծանրացել, որ գյուղերից ցիր ու ցան լինելով՝ սկսել էին փախչել այս ու այն կողմ: Տվյալ ժամանակաշրջանի թուրքերեն մի անանում ուղերձում, որն ուղղված է սուլթան Մուստաֆա II-ին (1695—1703), կարդում ենք. «Իմ տիրակալ, Ձեզ համար շատ կարևորություն ունեցող ռայայի վրայից անհրաժեշտ է վերացնել անսովոր հավաքվող հարկերը: Միևնույն ժամանակ բարձր հրաման արձակեք Օսմանյան կայսրությունում հաշվառում անցկացնելու մասին: Բեյլերբեյներին և սանջակբեյներին կայսերական հանձնարարական տվեք, որպեսզի այսուհետև ռայայից չգանձվեն կաֆթան բահայի, սելամիյեյի և նալ բահայի հարկերը»⁵⁸, քանի որ ռայայի վիճակը առանց այն էլ շատ ծանր է»⁵⁹:

Ոչ մահմեդական բնակչությունից գանձվող ամենածանր հարկերից մեկը գլխահարկն էր (չիդիեն): Ամենածանր հարկ լինելով հանդերձ, այն երբեք կայուն չափ չի ունեցել: Թեև թուրքական կանոնամեքներում, որպես օրենք, ընդունված է եղել 25 ալլեբ գումար, սակայն այն ունեցել է խիստ փոփոխական բնույթ և տարբեր ժամանակներում հասել է մինչև 240 ալլեբի: Նախ գլխահարկի հավաքման ընթացքում պաշտոնյաները գործադրել են կոպիտ կամայականություններ, իսկ պատերազմների ընթացքում պետության կողմից ապօրինի գլխահարկ է գանձվել տարին 2 անգամ: Հակոբ Կարնեցին ևս անդրադարձել է Օսմանյան կայսրության կենտրոնական և տեղական իշխանությունների հարկային ծանր քաղաքականությանը: Նա իր ինքնագիր հիշատակարաններում ահա թե ինչ է գրում. «Ով եղբայրք, յորժամ հանդիպիք ի յայս թղթիս մի մեղադրէք գրիս, զի Տաճիկք խիստ կու նեղացընին հարկապահանջութեան և խիստ տրտմեալ էի և իբր գերագի գրեցի»⁶⁰:

Երկարատև այդ պատերազմների ընթացքում հայերի և մյուս քրիստոնյա բնակչության համար աղետալի հետևանքներ է ունեցել նաև խաղաղ բնակչության գերեվարությունը և նրանց՝ որպես ստրուկների վաճառքը Կ. Պոլսում և այլ մեծ քաղաքներում: Էվլիա Չելեբիի տվյալներով ստրուկների առևտրով զբաղվող վաճառականների թիվը միայն Կ. Պոլսում եղել է մոտ 2000, «որոնք կովկասից, Վրաստանից և Ղրիմից իբրև նվիրական պատերազմի ասլրանք, ստրուկներ են բերել և վաճառել»⁶¹:

⁵⁶ Մանր ժամանակագրություններ, հ. 2, էջ 231:

⁵⁷ Պատմութիւն Առաքել վարդապետի Դարիժեցւոյ. Վաղարշապատ, 1896, էջ 78:

⁵⁸ Անօրինական գանձվող հարկեր:

⁵⁹ Belleten, 1969, № 129, s. 24—34.

⁶⁰ Մանր ժամանակագրություններ, հ. 2, էջ 584:

⁶¹ Թուրքական աղբյուրներ, հ. 7, էջ 36:

Միջնադարի հայ պատմիչ Սիմեոն Տիգրանակերտցին ահա թե ինչպես է նկարագրում քրիստոնյաների գերեվարման տխուր պատկերը. «Ի թուականիս հայոց Ռիթ (1580) ... բազում զօրս առաքեաց (սուլթան Մուրադը—Ա. Փ.) ի Պարսկաստան... և աւերեցին զբազում երկիր՝ և զամենսեանսն սուր սուսերի մաշեցին. և ի քրիստոնէից բազում և անթիւ գերի վարեցին... զոմանս սրոյ ճարակ տուին, և զբազումս գերեցին, զայր և զկին, զմեծ և զփոքր, զաղջկունս և զանմեղ տղայս ի քրիստոնէից, և այլ բազում ոճիրս գործեցին, զոր ոչ կարէ որ ընդ գրով արկանել կամ լեզուով ճառել զդառնութիւն և զնեղութիւն ժամանակիս...»⁶²:

Սիմեոն լեհացին ևս ականատեսի աչքով նկարագրել է և տվել Կ. Պոլսի «Եսիր բազարում» հայ գերիների վաճառահանման սրտաճմլիկ պատկերը. «Որք ծերք են և պառուր նստել են: Իսկ ղաղջուկնս և զմանկունս, զտղայս և ղաղվորներնս կանայս տէլլալնին առեսլ ի ձեռս դնոսա՝ շուրջ ածէին և ծախէին որպէս զծի և զջորի. և զայս ժողովեալ ի տեղի ինչ կամ ի մօյտանի՝ իբրև ոռլխարս ի փարախի: Իսկ զնօղքն եկեալ բանային գերեսս և ղծօցս կոյս աղջկանց և զամենայն մարմինս նոցա շօշափէին յօտաց մինչև ի գլուխ, զի մի փոս, խոց կամ այլ ինչ սպի վեղ ունիցին: Եւ նոքա լուռ և անմոռնչ կային, և զօրս հաճէին՝ զնէին, և որոշեալ ի հօրէ, ի մօրէ կամ ի քվերաց և յեղբարաց բաժանեալ առեալ տանէին ի տուն»⁶³:

Հայ կրոնական առաջնորդներն ու հեղինակություն վայելող անձինք անտարբեր չեն մնացել և ամեն կերպ պայքարել են՝ կանխելու և վերջ տալու հայ բնակչության գերեվարության ողբերգական երևույթին: Հակոբ Կարնեցին վկայում է, որ 1630 թ. կաթողիկոսի, ինչպես նաև էրզրումի հայ մեծահարուստ վաճառականների օանքերով որամի ուժով ազատել են մեծ թվով հայ գերիներ: Ի ուղարկել իրենց նախկին բնակավայրերը⁶⁴, իսկ 1724 թ. (հավանաբար օգոստոս ամսին) հայոց Կոլոտ պատրիարքը բողոք է հայտնել մեծ վեզիր Իբրահիմ փաշային, նկատել ունենալով, որ Կովկասի կողմերից մեծ թվով հայ գերիներ են բերված Կ. Պոլսում վաճառելու համար⁶⁵: Հայերը ինչպես նաև մյուս ոչ մահմեդական բնակիչները Կ. Պոլսում հաճախ ձգտել են զննել իրենց ազգակից ստրուկներին և պահել իրենց տներում: Սակայն XVI դարում արձակված սուլթանական հրովարտակներում նկատում ենք, որ Կ. Պոլսի ոչ մահմեդական հարուստներին խստով կերպով արգելվել է ստրուկ զննել: Օրինակ, 1560 թ. սուլթան Սուլեյմանի առձակած մի ֆերմանում կարո՞ւմ ենք. «Այսուհետև հրեաների և քրիստոնյաների մոտ գերիները ծառայություն չպետք է անեն, ազատ արձակված գերիները հանձնվելու են մահմեդականներին, իսկ գերի համարվողները վաճառվելու են նույնպես մահմեդականներին»⁶⁶:

Բնորոշ է, որ XVII դարի թուրք պատմագիր Կոչի բեյը իր ժամանակին խիստ քննադատության է ենթարկել օսմանյան թուրքիայում ժողովրդական բանգվածներին ճնշող և շահագործող շրջանների չարաշահումներն ու բռնությունները, հարկերի գանձման գործում արմատացած ապօրինությունները, երկրում ստեղծված անապահովությունը, թալանն ու կողոպուտը, ենիչերիական բանակի և այլ զորամասերի սանձարձակությունները⁶⁷:

Հայ ժողովրդի ծանր դրության մասին տեղին է հիշատակել նաև 1584 թ. Աղարիա կաթողիկոսի կատարած հետևյալ դառն եզրահանգումը. «Եմք իբրև դմի այդի առանց պարսպի և պահնորդի ցրուեալք աստ և անդ, և եմք զեւտ ոչ-

62 Հ. Մանանդյան, Հ. Աճառյան. Հայոց նոր վկաները (1155—1843). Վաղարշապատ, 1903, էջ 413—414:

63 Սիմեոն լեհացի. նշվ. աշխ., էջ 18—19:

64 Մանր ժամանակագրություններ, հ. 2, էջ 566:

65 Տե՛ս Գ. Բամպուրճյան. Հովհաննես պատրիարք Կոլոտ և իր աշակերտները. Ստամբուլ, 1984, էջ 43:

66 Ա. Ռեֆիկ. նշվ. աշխ., էջ 43—44:

67 Թուրքական աղբյուրներ, հ. Բ, էջ 230:

խար ի մէջ գալլոց և որպէս զգառինք ի մէջ արիւծոյ, և ամենեքին եմք դերի ի ներքոյ անողորմ տէրանց, որք վասն ամենայն օր տանջեն և շարշարեն զմեզ ազահութեամբ և ոչ կշառանան ընաւ զի տնանկ և աղքատ եմք և ոչ կարեմք շարժել քալլ մի առանց երկիւղի մեծ փորձանաց»⁶⁸։

Այսպէս ուրեմն։ Վերևում ընդված փաստերը վճռականորեն հերքում են ժամանակակից թուրք պատմաբանների ու քաղաքական գործիչների այն պնդումները, թե իրր օսմանյան սուլթանները հանդուրժողական քաղաքականութիւն են վարել հպատակ ազգերի նկատմամբ, թե քրիստոնյա ժողովուրդները ունեցել են արտոնութիւններ և չեն ենթարկվել ազգային ու կրօնական ճնշման ու հալածանքների։

ПОЛОЖЕНИЕ ЗАПАДНЫХ АРМЯН ПО ФЕРМАНАМ ОСМАНСКИХ СУЛТАНОВ (XVI—XVIII вв.)

А. А. ПАПАЗЯН

Резюме

В многочисленных ферманах османских султанов, как и в средневековых армянских источниках, содержатся важные сведения о тяжелом положении армянского народа, находившегося под гнетом османского деспотизма.

⁶⁸ Ա. Պափազյան. Պատմութիւն կաթողիկէ վարդապետութեան ի հայս. Վիեննա, 1878, էջ 309։